



SIARAN MEDIA KEMENTERIAN SAINS, TEKNOLOGI DAN INOVASI

LAWATAN KERJA YB MENTERI SAINS, TEKNOLOGI DAN INOVASI SEMPENA AUTUMN ECONOMIC FORUM 2025 HO CHI MINH CITY, VIETNAM

HO CHI MINH CITY, 27 November 2025 - YB Tuan Chang Lih Kang, Menteri Sains, Teknologi dan Inovasi telah mengadakan lawatan kerja ke Ho Chi Minh City, Vietnam bagi menghadiri Autumn Economic Forum 2025 yang berlangsung dari 25 hingga 27 November 2025. Forum anjuran People's Committee, Ho Chi Minh City ini menjadi platform dialog penting untuk pemimpin serantau membincangkan transformasi inovasi ke arah ekonomi pintar, lestari dan kompetitif.

Pada 25 November, YB Menteri mewakili Malaysia dalam sesi Youth Inspirational Talks: AI Generation NOW membawa topik "AI for Regional Innovation and Connectivity". Beliau menekankan usaha Malaysia melalui Pelan Hala Tuju AI 2021–2025 dalam membangunkan bakat AI serta memastikan tadbir urus beretika di era digital seiring dengan potensi besar ASEAN yang majoritinya terdiri daripada golongan muda.

Pada 26 November, YB Menteri turut menyampaikan ucap tama bertemakan "Advancing Inclusive Digital Transformation" yang menggariskan pendekatan menyeluruh Malaysia dalam transformasi digital merangkumi tadbir urus, penggunaan AI beretika, pembangunan bakat dan inovasi ekonomi inklusif.

Beliau turut menegaskan komitmen Malaysia untuk bekerjasama dengan rakan ASEAN dalam penyelarasan dasar serta pengukuhan ekosistem digital serantau.

YB Menteri turut mengadakan sesi pertemuan dua hala dengan Perdana Menteri Vietnam, TYT Pham Minh Chinh yang membincangkan kerjasama STI, keterjaminan makanan dan pensijilan halal termasuk cadangan mewujudkan pangkalan data bersama. YB Menteri menyatakan kesediaan Malaysia memperkukuh kerjasama tersebut serta menyampaikan ucapan takziah kepada Vietnam susulan bencana banjir baru-baru ini.

Selain itu dalam sesi makan tengah hari bersama Timbalan Perdana Menteri Vietnam, Bui Thanh Son, YB Menteri menyampaikan ucapan “Malaysia’s Path Toward a Hydrogen-Powered Economy” bagi menjelaskan strategi Malaysia membangunkan ekonomi hidrogen melalui inovasi dan kerjasama global untuk masa depan tenaga yang lebih hijau dan lestari.

Penyertaan Malaysia kali ini mencerminkan usaha diplomasi sains dan teknologi bersama Vietnam serta komitmen Malaysia sebagai Pengerusi ASEAN 2025 dalam memperkukuh keterhubungan dan inovasi serantau.

#TAMAT#

Disediakan oleh:

**KEMENTERIAN SAINS, TEKNOLOGI DAN INOVASI
27 NOVEMBER 2025**

